

四庫全書

集部

欽定四庫全書

集部

嵩山集卷三十一至  
四

詳校官起居注主事臣顧宗泰

主事臣呂雲棟覆勘

總校官進士臣繆琪

校對官中書臣王家賓

謄錄監生臣朱學廉

欽定四庫全書

嵩山集卷三十一

宋晁公遡撰

小東

樊瀘南

汝霖

即日風已戒寒伏惟按節瀘上神相萬福具此以候寢  
戈

二

邇日不省台用何如治府氣候雖冬亦不甚嚴沍況以中和臨之起居當超勝也更宜預為堙塞以順時令

三

守邊正須安靜者為宜節下忠厚之名徹于睿聽詔下之日孰不稱允今想先聲已騰滇池之外酋豪皆敬畏矣

四

朝廷思用老成以咨大政節下蜀耆英豈當久外今賜

瀘南之節姑示褒寵益部將輸之最耳行有騎詔

五

某向來密邇風規每歎老成人宅心知訓固自不同甚用矜式今承開府於瀘雖云異部然猶為接壤伐柯亦為不遠欣幸何可言

宋提刑上四幅同前卷查運使

五

某為貧所驅乃不自量得郡於巡屬號為難治之地顧

差以自寬者比得見於節下至語諄諄皆忠厚之訓獲以奉承施於有政庶幾免於戾矣幸甚幸甚

六

某自南浦送使華之西夙夜不忘馳心婦兄閭丘君繼蒙召至節下近又署尉曹某平生游於當世大君子之門多矣未有如節下不相忽棄者感刻不可寄喻敢併以為謝

張遂州震

即日暄濁已除伏惟始開大府神相靜治台候動止萬福某敬致一牋於墨曹

二

邇日不省台用何如伏計將適以時氣和體平豈惟復初更當過之耳風霜駸駸作寒事敢冀頤養神性永究遐福

三

某常念天子求治之切而神州尚未復者當是未有以

佐上者耳如節下向來在朝時議論凜然真稷契輩語  
若趣還表著盡行其言功業豈可量耶大藩不足留逸  
駕也

四

昨者解寧江節符而歸遂安林泉之上士大夫無不高  
此舉顧抱如此才器而置于閒地為國遠慮者以為非  
宜聖上求賢如不及豈有見賢而不用耶果審就付武  
信印綬試之詳者其委任必大行且遣鋒車至矣



五

某遊于門庭舊矣間建牙而出某竊為之喜非其私也  
喜一方受其賜矣敢無一言以贊其父老之喜顧恨短  
筆不能盡萬分併冀台察

魏普州

即日暑氣隆赫伏惟黃堂靚深台候萬福因步吏之還  
奉此答

二

治所聞是山川爽氣所集炎月當高涼矣更宜順時令  
薄滋味為佳耳

三

某久在硤內不復與蜀士大夫遊比至此邦問名德而  
訪耆哲知左右乃乘熊軾在外藩不得有所矜式但劇  
懷詠其可量耶

四

某不自量來此難服之邦正望鄉之耆年宿輩有以陳

舊聞而道遺俗以見教方欲致書於鈴下以此仰咨不  
謂先承手札之貽意則厚矣顧非所望於先生長者也  
自力作牋併叙鄙悰

伏長寧

即日涼風初至伏惟撫寧徼外神相循良台候萬福未  
間厚自持前賜弓鉞

二

左右功在盟府蓋常總益部之兵符其任重矣顧乃屈

守一障之地何也第恐公朝未知之耳行有騎詔

三

強獠平日亦時不免小小跳梁聞自麾幢臨之極馴服  
塞下無夜吠之警守邊果在得賢勝于長城遠矣甚賀  
甚賀

四

頃在益州得一見雖小慰積年懷向顧忽忽為恨耳自  
爾耿耿不相聞但劇馳心蓋至今也

五

去三月至此雖免乏食之憂而短才不勝其任日困于期會簿書之間欲為一牋之間迄今未暇也遠承貽書情旨俱腆開讀愧汗洽背亟作此報幸恕其略

六

此邦有委幸不自它某久聞治所出奇石欲得小峰可為筆格并可焚香者各一敢望歷意干浼愧仄

潼川袁通判

即日雨欲戒寒伏惟雍容州端台候萬福因函使之還  
奉此為問

二

梓中氣候令何如牛頭鶴林蚤有爽氣想起居愜此秋  
清眠食定佳也更宜盡珍重理

三

比見公在州縣間不啻如野鶴在雞羣昂昂有凌霄之  
氣謂即聲聞于天矣不謂尚爾乘屏星車於外藩也良

為缺望

四

虞仁壽公甚為主上尊禮方倚以收天下之才以興造  
功業左右行當不俟駕行矣願言趣裝以待

五

違闊不可計日矣懷向未嘗忘但平生懶作世俗書故  
至今未果通訊耳遠承貽書如待上官非所望於雅遊  
也開讀且愧且感亟就研削為報幸恕漫略

答嘉州趙通判

烏牛山氣今當寒矣伏惟泥軾對之台候勝常未間千萬保齊前有九遷

二

連辱手誨不忘前日下邑之敬感感刻刻來牋情辭貶屈太甚何必爾耶苟肝膽相照無事空言可也併冀字亮

三



相與俱落南客節至但有感慨遠承以履長見賀不敢  
當也惟勉進於道與陽皆長乃誠所願

答叙州杜通判

即日暮春伏惟雍容州端神明所相台候萬福奉此牋  
以復將命

二

比辰不審台用何如今歲節物遽爾妍暖桃李事已退  
伏惟多受春和體履休勝更宜盡消息之方為佳耳

三

益部號為士大夫之崑岡所出必為當世之寶顧乃屈  
佐一邑瑚璉之器不應爾耳佇觀登於清廟始為稱也

四

某久寄峽內不得見益部之英俊每有固陋之慚遠貺  
手誨譽之過其實開讀不覺汗洽背果辱愛憐繼此願  
聞直亮之益

五

某得守眉陽雖喜不乏食顧不稱其地奈何浮家西來  
正欲咨訪蜀士之秀今知執事近在樊道願見之心以  
日為歲須面乃既所懷

隆州李簽判

繁

牛刀匣而不用幾彌年矣今得一邦佐刺史恢恢有餘  
地殆不足盡長才天下固多盤錯公朝豈容利器置閒  
處耶

答簡州鄧通判

即日暄濁已除伏惟神相休舍台候萬福未間千萬厚  
自持升刺大州

二

治所號為劔西道院封內沃饒民不約而趨令無勞程  
督可與邦君坐嘯而臨之遙想泥軾始至當甚喜也

三

左右精明之才發于盛壯之時今更踐多矣聞見益博  
其於為政殆不復為勞顧尚屈陪貳之位士論良未快

也自今最狀升聞必賜二千石印綬幸少須之

四

自吳下始識風度爾後不多會集向來益州匆匆殊不  
盡兩懷至今惘然遠承音介見存開讀華牋感愧不勝  
道自力作答百不一陳

答石簽判

即日燒雞行水伏惟雍容大府尊候萬福未有見日子  
萬厚自持遂膺簡拔

二

其未得豫英俊之遊而讀東坡先生之詩已知世家乃  
此州三老之一其憑藉厚矣豈謂尚游外藩耶佇有吉  
徵

三

其隨牒推遷而得此邦顧為貧所迫遂忘不能者止之  
戒視事已三月想為閭里譏切多矣正愧仄間遠辱惠  
書盛有稱道豈所望於一鄉之善士也耶勉作答殊漫

略併幸照察

四

古之為邦者正須得成德耆宿問風俗之所宜求前事之可師某之來正恨左右之在遠也尚有可以垂教否亦鄉黨所冀于仁人之言有溥哉之利也

答朱宣幹

知為益部大家而未得瞻承為恨此部蓋如崑崙所出必瑰竒何乃爾淹於外太府耶

答楊知縣

凜秋之別忽見星回伏惟課効已應歲會尊候勝常未  
間更祈厚自持前有九遷

二

三秦由來近鄠鎬其風聲剛毅某涉世之久益厭浮偽  
比於試闈得見左右氣勁而持論甚公每懷欣歎使士  
大夫皆然郡縣豈有不治者耶至今不忘於懷

三



治所久不理得飛鳥臨之想百姓始知有官曹而惡吏  
斂手矣今當事簡亦足自適否承公朝論功遷以中都  
官吾黨亦知勸也

四

某既歸亦如公料理積事極不暇程季藩歸不能為一  
書止令致多問之意甚愧今乃遠辱眷存先貺翰札開  
讀益增慚感

嵩山集卷三十一

欽定四庫全書

嵩山集卷三十二

宋 晁公遡 撰

小東

張待制

震

即日歲且更始共惟齋舫按行如在枕席神明所相台  
候動止萬福某先遣一介前候次舍

二

比辰不省台用何如伏惟久厭硤內山麓土惡今入益部所見水石清嘉復近始和更加秀麗想高懷甚喜飲食為有味且佳眠也然所以願生者尚敢以為請

三

蘆部之人得公二年覆露之正如蒙霧而行莫知其潤斯為陰德多矣古之君子為政直如是耳彼求赫赫名者淺哉其爲人也節下亦肯此言否

四

某遊子思故鄉聖賢皆不能免伏惟節下連率印綬而歸其為忻喜可知也然聖賢出處之論固以為不可久出亦不可久處公豈可懷抱濟世之具而不一拯斯民乎主上亦必念此願無弛擔行且追鋒至矣

五

某去節下甚久不勝朝夕之思幾夢寐見之喜聞牙樯近止即約束官奴買花鈿酒人潔壺觴願親執筭於尊下請車騎振臨之以盡門牆之情亦使徒馭少休跋涉

之勞也敢先以布下執事

陳茶馬

彌作

即日麥秋至共惟六轡徐行原隰有光神明並相台候  
動止萬福某敬遣一介以候前驅

二

邇日不審台用何如盛德所臨百靈自當呵禦不祥伏  
想當此炎夏山川之氣皆効清凉更乞盡消息之方不  
勝至請

三

天下之俗委靡不振久矣士大夫習於寬簡非君子剛大之氣其孰能起之某得諸縉紳之論以為今可望以此者捨節下其誰哉蜀部聞風已皆有立志某獨恨所被者狹耳何時曠然盡變天下之俗耶拭目以俟

四

推牧之政蓋可以強兵而富國主上舉以屬之節下其意深矣方此講好修睦正當閒暇之時使茶戶富實取

其饒以助給軍食出徼外之駿以佐卒乘為之數年恢復之具成矣節下當擅此功天下幸甚

五

某流落遠方以貧所驅而冒處劇郡欲罷不能重以積敝之後府庫空虛賦入不及所出之半視事踰月矣茫然未知所圖惟當夙夜匪懈而已更望高明有以誨告之某之願也

宋知郡



即日嘗耐伏惟談笑而了一州神明加相台候萬福奉  
此牋致之鈴下

二

比朝台用何如治所山川沃饒近監氣候當不同它邦  
其在啓處定佳也更冀厚自持前遂增秩

三

大名洋洋於縉紳間某聞之久矣而未得瞻承但恨經  
遠之跼不應屈於外藩使儒者之用不究耳聖上豈遺

賢者竚有持招

四

此邦與重部接壤休聲日與郵傳俱來為政者得矜式  
矣某不量力而當煩劇所喜伐柯不遠敢以墨啓致區  
區之情

五

某視事已再浹日而承積弊之久府庫一空賴為計庭  
憐察于治府給鹽五十擔某不喜計庭知其匱乏而喜

執事之波必能及此土也敢遣一介以請伏望憐察

黎彭山

歲晏冰霜凜凜伏惟尊候勝常未間千萬眷志和補勉  
應最條

二

劍西蓋多才矣雖未瞻奉已知其出於名國萬家之城  
必非生於三家市者比也何尚未掀奮而起乎

三

彭山久不治郡庭每以為憂今承外選推擇其才不待  
注唱必清議所歸也願副此意使老守有以塞責乃幸

四

遠承書札甚寵此浮言也固愛華爛足以動心駭目猶  
不若使施於有政俾塗歌里詠為佳耳所冀勉旃

答蘇監稅

即日風且解凍伏惟喬木在望尊候勝常未間更祈澡  
練前繼此業

二

行役往返幾萬里矣跋涉不至勞乎歷覽山川太史公所以成一家言想所得良多會當發於斯文

三

向來於李仁甫坐上見眉宇秀徹謂當即翺翔矣何始爾結綬乎功名自有時更涵養以須之關市之征不足涵子也

四

自來此邦訪問里中之英怪左右不在焉方切懷詠辱  
手札勤勤懇懇便如晤對欣快何言更遲劇語

答李眉山

即日布農事伏惟休駕里中尊候萬福未間千萬噓吸  
冲和前有翹車之招

二

某始來方在絲琴中公獨助我使不復憶有一縣不敢  
忘此但遽解組而歸為之悵然累日也

三

某向來每賴相規真我三益之友也飛鳥既去尚能惠藥石之誨今世豈復有若人也感刻不勝道區區具之牋中

四

承釋此喧闐而就燕閒大可樂也春首幸一至堰上無忘斯民敢復以告

與諸司屬官

即日氣迎槐序伏惟雍容賓筵神相賢勞台候萬福某  
遣此介代謁

二

適日不省台用何如儒者必觀夏小正之書順其時令  
以自調適更冀加之意而已不勝區區之請

三

漢之所取為公卿者多自諸府參佐今朝廷益重此選  
率自除用蓋將試其才以漢制待之也伏惟執事之德



業朝廷所知出以輔其長藹然有聲矣佇觀趣召

答楊茶幹

即日萍始生伏惟帳下清閒台候萬福因函使之還奉  
此記

二

起居比何如益州風土最美西山之雪下照城郭雖近  
炎月當亦爽塏食寐甚宜更冀厚自持前有九遷

三

益部蓋多賢矣而此邦尤為英俊之躔其一時之秀比  
略得見之獨恨車騎未歸不獲瞻承為惘惘耳何時按  
部而來豁此馳情

四

某得郡于此實受大府控制其事叅佐敢不敬比忽忽  
遣一介上記尚未返乃辱札翰下逮如待先生長者於  
盛德固美矣得不損大府之尊乎開讀之次始覺前所  
上記大為漫略愧仄不可言今併摧謝幸望矜亮

答郭撫幹

雨罷山川有佳色  
伏惟憑軾徐行神相次  
舍尊侯勝常  
未間更祈厚自持  
前有弓招

二

某豫大門羣從之遊而獨未識風儀  
要知出於藍田者  
莫非美玉也  
顧尚淹外府豈其稱耶  
行且橫奮

三

某受夔州之知見夔州所與者敢不敬  
況其親昵耶  
舟

航已戒津吏無苛留何時復東還亦取道於此否尚冀  
瞻晤慰其傾佇某不敏先辱勞苦之間愧仄何言

答宇文教授

即日錦江風物益佳伏惟尊候萬福未間更祈珍攝前  
有橫奮

二

庠序之教可以化民成俗其功亦大矣然以公之才居  
之猶為閒地某固知此不足久留逸駕也但恨衰遲遽

失助我者奈何

三

某比方弛擔公則巾車矣曾不獲為數旬客恨恨何言  
印紙廩券並如所屬也郭君更為趣之如須幾何人當  
遣去來書云更有可任者為誰一一開諭某非善斷者  
血指汗顏之聲想已流傳幸垂告

答程簽判

即日麥已登場伏惟叅決郡政有神相之台候萬福奉

此記以復將命者

二

台用比復何如炎涼之交更宜厚自顧前須先除乃誠扣扣

三

其頃游益部見諸公治行甚美上方勵精政事思得郡縣之最以次表用何為尚游外藩耶行且有尺一至矣

四

家弟每歎長才某聞其言甚思會晤遂州忽忽一見雖  
慰夙心而恨不從容爾竭來為郡亦訪問鄉曲之英乃  
知車騎遠在他部殊極懷詠正擬修書乃辱手誨先之  
尤深愧仄也自力為報百不一陳

答楊縣尉

即日王瓜生伏惟盜奔它境雍容無事尊候萬福未間  
更祈珍頤前有最賞

二

比承東歸過梁山得接辭氣知左右蓋益部長者屈為  
縣游徼良非其宜爾勉務政事會有識察

三

某逐食求郡乃得煩劇始甚懼不滿邦人之望相與有  
一日之好宜告以里閭之所宜都不及此而盛見稱頌  
豈所望於耆宿也繼此有可以誨諭否

四

向來於雲頂山為何卿祠堂作數語不足觀也不謂主



僧刻之石公更舉副墨見遺無乃為調嗤否乎雖荷厚  
意益憎愧仄

嵩山集卷三十二

欽定四庫全書

嵩山集卷三十三

宋 晁公遡 撰

小東

答史靈泉

畢

即日風扇朱宸伏惟巖邑清曠尊候萬福未間更冀  
厚自頤前位顯密

二

公此邦大家也蓋如高山窮谷固為多材其榱桷枯柏則其最耳植根所滋至今稱美不待一見已深頌慕但恨一邑不足淹也

三

侍郎家兄受尊大君之知闔宗不敢忘承敦此好益見拳拳於先友如此彌增感佩

四

某之才為數千戶之長亦自不稱忽逐食來此日懷愧

懼正望鄉人之善者有以規之不謂遠貺書札溢於頌  
詠愈劇悚仄不省繼此能貽藥石之言乎

答蘇小溪

即日綠野已秀伏惟民安善政尊候萬福奉此牋復來  
幹

二

起居比復何如遂州風氣清淑左右亦宜之否更乞厚  
自持必不久于百里淹也

三

封內亦易治平公家所論刑賞忠厚之至蓋可以施於  
政者必復用之近聞蜀士多趣召東坡先生忠直之節  
朝廷想思之豈容其後尚滯州縣耶

四

金水之別不覺便許久某繼此之官梁山短才日困簿  
書既二年復易守是邦行役幾兩月疲繭可知也未遑  
為問先承翰札之貺公之鄉閭易治而難服某未知其

方亦能見誨否

答宋漢初

即日天地閉藏伏惟弦歌無事尊候萬福未間更祈厚  
自持前躡要途

二

久不聞音息不謂尚爾徊翔百里地富貴要自有時願  
加涵養以須之

三

臨江之別為日遠矣靡日不懷但無從致問先辱記存  
貺以翰墨如事其長何也尤增愧仄忽忽布答不盡所  
欲言

四

漢初亦易治否今公朝議蠲虛額自今郡縣拜賜況在  
政成益當擁黃紬高眠耳更書復在何時此去遂改中  
都官乎

答謝眉山



即日歲晏多陰伏惟尊候萬福未間千萬厚自持前最  
察舉

二

劍西人物不與他州並公儒家者流所傳遠矣尤當秀  
出恨未見爾良深延佇

三

眉山亦劇邑老朽所冀縣有賢君得以蒙成幸矣公不  
屑就之必能不孤此意願言勉旃

四

遠辱書札稱詠過其實世俗浮言聞之多矣幸相與為篤實之論自力作報望亮其略

與吳提幹

即日麥已食新伏惟交修摧牧之政主公詢仰神明加相台候萬福某無由詣賓客之席輒以牋代謁

二

不省台用何如七閩山川清麗過于蜀部不審君子居

之亦安其土風否更乞厚自持以合四時之和

三

某平生頗與世異鹹酸惟樂間賢士大夫之名每有得焉輒累日喜以為吾黨其振乎此邦往來之郊近屢有自益州來者無不稱頌左右蓋數十年幕府所未見也  
佇觀亟徵

四

為郡於明使者之封內聞有叅佐至帳下即當為牋自

通姓名實故事也敢敬以徹於左右伏惟明使者風望  
凜然更得九德之彥為之輔此部幸矣豈惟鄙夫

答楊知縣

即日農乃登麥伏惟鳬鳬就道尊候勝常未間所冀厚  
自持前施所學

二

益部號多才公其耆舊也必有以異于其儔者行觀設  
施以副所望

三

聞之邦人公所得邑最為易治然天下豈有難易者能以公勤廉清臨之則雖難治者亦易矣不然一閭之市豈易服乎竊計高懷深達於此老守之幸也

四

遠承惠書諄諄疊重浮語虛辭世俗所不能廢然自今更望相與為篤實之政非賢者其誰望

答張彭山

即日草木鮮榮伏惟尊候萬福未間千萬保頤前膺推  
擇

二

為別屬耳更勤寵問在行李中當亦勞也猶能及此耶  
感佩至情其何可言

三

所諭廩食有不給者須得公驗今付僮幹怱怱作答幸  
亮之

答陳縣丞

邇來蒸溽伏惟尊候萬福未間千萬調適更須光除

二

蜀蓋多才矣然未見有磊磊落落大厭人意者豈某見不多耶左右肯來為丞督事必能使衰拙有所驚歎乃所望也

三

甫爾至郡庭方懼無以為政官屬賢者能有以教其不

逮則幸也遠辱來書溢於稱頌不敢當不敢當意者必待見而後言耶繼此以俟

答黃教授

即日稻將登矣伏惟尚留片宮尊候萬福未間千萬珍攝前進班列

二

此間已報代更意謂但持閤閱下三硯中臺論功則必當量才定位當在虎闥何尚陸沈耶



三

承以論薦之章上於公車仕宦得去小宰之選旬除歲  
遷自可坐致爵位以為親榮聞之喜甚遙為左右賀貽  
書歸德於衰鈍知拳拳不忘良增嘉歎

四

某來此已四告朔尋常硤內望風謂益部難治令身履  
之前言謬矣比來殊無事公能一來同登遠景樓舉酒  
相屬乎延佇延佇

答劉知錄

即日草木敷榮伏惟折獄有閒尊候萬福未間更祈厚  
頤前進班秩

二

相從一邦良賴賢者之助臨歧又勤追送至情乃爾但  
增感歎人生如鹿豕然此別所望進德修業它日有聞  
于此以慰老懷

三

其違異以來每恨傾企遠辱不忘更貺華翰溢於稱頌  
非所以輔衰朽者愧不敢領此意也已見祥刑公如所  
戒言之矣

答王丹稜

即日寒蟬鳴伏惟尊候萬福未間更冀厚自持前上要  
津

二

某頃常預在太常籍奏中是時歎慕高才而取上第謂

即翱翔天朝矣豈意尚爾陸沈州縣耶功名會自有時  
更少須之

三

丹稜地亦褊小左右春秋之學長於治人肯來臨百里  
行稱最矣其如留滯何

四

某迂疎非治郡才推移至此每以為愧正望賢者佐之  
乃可塞職爾遠辱一函推許過其實不敢當惟有以相

輔則幸甚

答張監稅

即日草木茂遂伏惟里舍就閒尊候萬福未間切祈調適前膺最賞

二

益州文物盛矣左右天資之秀加以耳濡目染必將有異於它邦之士惟升高者必自下從茲佇觀橫奮

三

某得一州短淺豈能獨任其責正賴左右之賢相與共圖之公職是筭緡必能使行旅願出其途則某所望也

四

久處硤內未果早識英標遠貺書札辭華璀璨遙知為勝士也何時遂來以慰馳懷

答師將仕

即日春事垂盡伏惟優游里舍尊候萬福未間更祈厚  
嗇前有推擇

二

廣漠之別不覺草木三發榮矣道遠不相聞惟有懷向  
良晤在旬朝間預為欣浣

三

知己遂懷黃亦足慰平生力學之勤也外選何日唱注  
佇觀治行

四

某得郡於益部乃是今之好學之國寡陋何以滿羣望

方以愧悚遠辱書滕稱譽甚過非所堪也

答楊解元

即日行遂嘗夤伏惟起居勝常未間更祈厚頤前豫賓

興

二

益部信多士遠辱詞翰粲然溢目行見一第溷子矣願  
言勉旃

三



某久處硤內不相聞披玩來書知相與有連甚慰甚慰  
既在外屬宜有以規諫不當若疎者徒為頌詠也所諭  
須移試偶數日前已白計庭云無之奈何幸體亮

嵩山集卷三十三

欽定四庫全書

嵩山集卷三十四

宋 晁公遡 撰

劄子

王叅政

某守地不得從百執事之後日至黃閣問起居不省鈞  
用比何如恭惟大君子體道四時一致推其緒餘以福  
方內神明所佑鈞候動止萬福某敢為天下以請持精

養神永為人主之基杖

二

某間者將去梁山以饑為憂忽易守眉陽退而思念恩公蓋嘗憐察而以二條薦於朝今而獲此豈敢忘大賜初視賤事即遣步吏奉一牋代端拜以謝伏惟鈞慈必賜矜覽干犯威尊至今愧懼

三

某忽忽至此已四告朔夙夜効職幸不致大曠敗以為

門牆羞然才薄地大終恐非所宜處要不敢不免惟屈指以計去日以俟大鈞之播幸甚幸甚

虞叅政

比日始有清和意不省中台之光所照山川氣序何如  
伏惟赤舄燕居倍膺冲粹加以神相鈞候動止萬福某  
守地不得詣行馬之前敢乞為天下未究之功盡消息  
理以須璽召

二

某伏聞衮衣西歸凡鄉黨之士與嘗從賓客之游者無  
不迎于道路候於里門而某平日受兩世之知最厚顧  
獨不得前豈勝愧恨雖再上牋牘終不能紓下情萬分  
也伏紙悚仄

三

某敢問久處衡軸乍還甲舍向來封植之木皆已成陰  
按行三徑景物增麗雖釋機務之勞就此閒暇固足以  
樂敢誦獨樂園之詩恐造物不我捨耳某敬傾耳以聽

四

某伏惟門下翹材之館固應日盛日富而平昔得之於  
硤內者惟某與李捷為耳捷為尤答颯不振甚為門牆  
羞近聞大為州將所苦且將就逮極可念能為解其急  
者非歸窮於門下不可敢亟以請儻軫鈞懷徑從府庭  
遣一介致書於州將宜聽率爾申論皇悸

五

某為郡綬所縻不得預賓客之下者得見於四府敢以

一戕代躬問起居狀不省鈞用比何如恭惟輔佐明主  
建中和之極赤烏宴處與時具宜加以神相鈞候動止  
萬福某輒量王室倚賴與中外屬望之意敬以持生為  
請

六

某平生得士大夫不鄙而與之遊者蓋二十五年矣率  
未有震耀於世者豈由某之窮累之耶比聞大君子立  
歸然之功聖上倚以為重俾執天下之樞與謀大政某



不覺失喜噓嘔者累日誠是輔相之才自當軒天地而  
出豈惟某之窮不足仰累殆是某之窮將瘳矣自今更  
須爰立作相別為中外賀

七

某去年十一月將去梁山方念蜀銓無注擬處何以瘳  
饑不勝皇皇之憂退竊思之豈有伊尹在上而使門下  
士有饑者乎已而果被命易守此邦嘗奉一函謝於黃  
閣之前今饑則免矣然地大才薄復恐非所宜處要不敢

不勉忽忽四告朔無大曠敗屈指以計去日更俟大鈞之播

虞樞密

某近已上一牋於墨曹以候起居狀不省邇來赤舄入蜀次舍何如恭惟忠貫日月所在神祇自當擁衛鈞候動止萬福某無由侍寢戈敢乞嗇性養恬指授既竟遂歸廟堂

二

某伏念西樞之府出臨蜀漢凡在巡屬禮當奔走於前  
後某屬有官次不可越境故遣一騶持咫尺之書代趨  
謁特蒙鈞慈眷接加等賜以手教撫存甚厚下情感刻  
不知所言

三

某聞蜀人向來岌岌不寧有境外憂今見黃鉞來皆按  
堵想敵國守約益謹也此方何足久勞當歸從崑廊之  
游圖回天下乃中外之望

楊叅政

某昨日詣鈞屏禮也伏蒙親屈赤舄之尊而辱臨之三台之光爛然下照不覺眩目失措當即往謝於行馬之前不敢更為副丞相揖客之勞仰乞鈞照

又

某昨日侍尊下致辱親屈衮衣之尊賜之卮酒某無以稱此復上雅壽使營妓歌小詞以為侑退切慄恐但蒙鈞慈不謂之瀆已幸矣豈料俯為寵和是亦漢相國與

小吏歌呼相和之意也敬當藏之以為黃鍾大呂之寶

張待制

函使至伏聞齋舫已次凌雲之下敢問犯此寒江挽牽  
而上神相行役台候動止萬福某日須擊汰之音見於  
檣下更乞洗練神宅迎舍春和

又

某自審麾幢去夔門日日問諸道路盖久不望先儀願  
見之心不啻饑渴比傳舉還鄉之旆次舍近止即遣伉

步奉牋迎諸榜人尚未返今日忽拜手命若待儕流顧  
惟白首百僚底敢望西掖貴人寵待如此感刻不勝道  
更遲面謝以究

又

某伏蒙一番開諭勤懇某敬皆遵承即日下彭山雇竹  
筏十五并約束館人供張以待區區敝邑乃得車騎臨  
之墓顧山光溢於原野矣幸甚

又

某日日俟車騎至舍下欲遣一介候起居狀而春來益復多事短才不勝其任遂未果遣忽奉手誨開讀愧仄且復感歎今之通官貴人誰肯如此敢問台用比何如恭惟三徑如昨手植益茂可以偃息神相燕閒台候動止萬福某已一年於此預憂退歸無以續食也使航謹如所戒以行未間惟乞盡消息理再立玉墀論天下事中外幸甚

又

某恃門下知察不敢自同衆人有懷不盡吐於受恩之地故敢言之某生十一年而孤為孫姑丈所教育已恨不及其存時報之今孫氏惟有一孫文昌見任南平軍司理叅軍輒不自量欲其改中都官使少慰其下衆念不告於節下其孰能憐其不背本之情而成其欲報之志敢望台慈特賜惻念或論薦之員已滿特為推轂於查周二使者不勝幸甚干冒威嚴死罪

又



某去大府邈乎千里之遠不得遣一介問起居比因僂  
步至吳下奉牋於侍史殆非專敬每懷愧懼今日忽拜  
手命乃蒙高明不以是督過之勞問拳拳如待素交老  
來所閱天下滔滔獨見此爾甚盛甚盛不省台用比何  
如恭惟白鹽赤甲秋氣已高坐撫連城數十神相靜治  
台候動止萬福某守地未被汰遣無由瞻謁敢望盡消  
息理前有急召

又

某比在梁山顧得二年而以理去非真勝任而然爾蓋  
節下與諸公有以容察之也竭來此邦誰復知之重以  
迂拙之性與衆異鹹酸反不及范才叔臥治之因是益  
感歎如節下誠為難遇遠蒙告以事有不可為者以此  
邦觀之亦可知矣須印書籍并其目授來幹併乞台察

又

某區區之地近辱持紫荷之橐照之先生原野幸甚幸  
甚但念不能更少留車騎為恨耳不省台用比何如恭

惟喬木在望大慰歸志神相次舍台候動止萬福某未  
有再侍几杖之日敢乞蕃舍冲和為蒼生一起

又

某邇來益無官情其如貧驅之奈何方今虛額為州縣  
害故申言之今乃詰問紛紛期於無虛額而後已付之  
慨歎近又常平司來封閉諸倉收其管鑰自來逐年兌  
支至十月收租撥還今則即日軍兵絕食事干軍政念  
之凜凜因見益州試論其狀得已之大幸忽忽亟遣此

介更俟休駕里中專好為狀併冀台察

又

某喜於大君子為時而起一方蒙其休澤比輒上一牋  
重勤裁報感戴重眷無地寄喻行更好為狀伏冀台察

費寶文行之

某守地且遠不得日承起居狀敢問涉秋台用何如恭  
惟君子善養浩然之氣宜于四時加以神相善政台候  
動止萬福某於法不可越境無由詣鉤坐惟乞盡消息

理佇膺大政之咨

又

某窮薄所致遭窮空之後今幸部內相安調度不至不給皆恩公所以誨告為政之方故至此爾銘佩不敢忘

又

某得一州安敢便以法繩官屬惟黃滙者始留之詰問征筭之虧傲然不顧而徑去已具申省部矣今付之有司某亦不得輕重也凡事若愛之者使免則惡之者亦

可使不免矣更望台察

又

某連日併奉二告便如朝夕在公坐其間起居狀為詳  
下情喜不可言敢問信後台用復何如炎日過中甘雨  
時作煩蒸為解共惟大府政條清簡登臨紅白樓神相  
步武台候動止萬福某守地無由趨謁所冀積精適神  
再開宣室

又

某伏惟節蓋臨梓中亦復久矣膚寸之雲尚留太山未  
澤天下其在梓中則幸也屢聞恩公欲脫屣而去休於  
丘園又如梓中何想勉為大君且作三年淹也

又

某念不得至門庭故比專遣步吏抒情悃敢勤恩公兩  
賜札翰此意之厚近世所未有某何以堪之哉惟當益  
勵朽鈍無致曠職為賓筵羞不識亦足以為報否

又

某賴恩公之庇既得於梁山理去又叨除守眉陽某敢  
忘德竊恃異眷輒復有請於節下某眉陽考滿當升知  
州資序法須論奏者三章豈可捨知己而異日求之於  
它門敢望於察檢照昨按臨夔部某紹興三十年內任  
施州通判日合舉之數特賜剡牘不勝幸甚

嵩山集卷三十四



欽定四庫全書

集部

嵩山集卷三十五至

詳校官起居注主事<sub>臣</sub>顧宗泰

主事<sub>臣</sub>呂雲棟覆勘

總校官進士<sub>臣</sub>繆琪

校對官中書<sub>臣</sub>王家賓

謄錄監生<sub>臣</sub>朱學廉

欽定四庫全書

嵩山集卷三十五

宋 晁公遡 撰

劄子

上汪制置

應辰

某不自量久居於蜀見其窮困常為蜀憂朝夕顚顚惟望朝廷有以救之伏惟國家聖聖相授恭儉愛人但恐有所不知知之未嘗不惻怛加惠昨者已蒙遣鍾郎中

至蜀裕民而當時不能仰體聖意將虛額錢盡行蠲除  
顧乃遺患至今使州縣捃捫係省租賦侵奪官兵廩食  
空竭府庫以求趣辦某每慮天時不能常豐或遭荒年  
百姓艱於輸送府庫又無儲積不惟有乏軍興兼官兵  
無以贍給思之可為寒心而當途諸公孰有念及此者  
某仄聞節下學道之至更事之多蓋嘗深慮遠覽有意  
於此今幸朝廷灼知前日虛額尚存特命總領所以所  
椿錢引三百萬代充大軍用度向若未有此錢猶當措

置況已有備豈可不盡用以救其急哉全蜀之人初聞之日無不東向歡呼稱頌聖明想節下亦為之喜也某竊譬之陽春之澤歲不可再令聖恩汪濊蓋已再下矣則知朝廷何嘗吝所放之太多而使所除之不盡有司不可防所申之未實而坐視所及之不廣遂令郡縣追恨以盧扁之難遇幸而遇之而靳惜藥石長病根復如鍾郎中之來有失上意致煩宸慮更下此詔豈宣廣詔書勤恤民隱者之所宜哉某重惟民者天民天豈不恤

抑其有數以待節下伏惟斷自高明勿徇吏議使郡縣  
抱虛之額因節下而除朝廷裕民之意至節下而始盡  
既以下救困乏又可上寬顧憂所有本州虛額錢計一  
十萬七千餘緡絹九千六十九疋已別具狀申陳儻獲  
盡從蠲除非獨某一州幸甚實亦全蜀幸甚敢乞台慈  
俯賜詳察

又

某竊見四川州縣財力窘迫所在官兵多不能以時支

給錢糧豐年尚復如此一有饑饉實可寒心近准朝廷  
旨揮以總領所見捲管錢引三百萬道用除州縣虛額  
應副大軍自此州縣免將官兵合得錢糧侵那起發大  
軍虛額之數不至如前窘迫雖遇饑饉之年似亦少可  
支梧然其竊詳朝廷之意蓋念民力重困今來所除州  
縣應副大軍虛額與民力係是兩事州縣之困在於侵  
那租賦民力之困在於科斂重大且如本州大軍春冬  
衣絹以人戶稅錢每三百文以上科納絹一疋之類則

是取之幾二十倍以上其於民力可謂重困正當仰體德意有以寬之某契勘州縣虛額多是實無之數每年亦不曾起發得足只是總領所將今年之錢償補作去年之額年年如此虛掛其欠於簿籍無可催理若取見遞年實到庫錢數即知所謂虛額者非大軍指準支遣便可據實豁除所有遞年實到庫錢數如後來又有虧迭不敷去處則將上件錢引三百萬道量與補填其百姓所科官物亦與裁減從輕隨所餘錢數以上件錢引

却行對補如此州縣省計不闕則錢糧足用不致預有  
科借百姓重斂既輕則民力亦寬可以增固基本伏惟  
節下出宣天子德澤撫安四道之民固欲使州縣給足  
百姓富實况承上旨乃是天與節下除弊興利之時以  
成節下除弊興利之志蜀人相慶不易逢此某退竊自  
念身為州縣長吏常恨無力以拯民病幸遇其時豈忍  
緘默先已具論州縣從來虛額蠲除不盡因依今更有  
管窺之見率爾申陳或可以採擇之乞賜詳酌施行伏



候台旨

又

某非有建白不敢以牋牘至大府以是久不聞起居狀  
敢問台候比何如春晚不謂乃爾作寒恭惟寢戈在衛  
宴坐高明復御兼衣神明並相台候動止萬福某未由  
叅詣公座敢乞盡珍重理即當入見延英

又

某不任治郡顧免吏議尚爾充位于今已書吏考豈不

知所自伏惟節下條教清簡易以遵承人無大過輒皆容覆是以雖此迂愚亦得竊食於下幸甚幸甚

又

某與全蜀之人感荷聖明燭幽深詔節下以除州縣抱虛之害雖尚未拜賜而闔部欣欣知節下之意惻怛之至某竊嘗自喜此害果去州縣庶幾少寬近得財賦所公文復來追理紹興八年鹽酒餘剩錢不覺歎息豈非天欲困此州縣乎今日之抱虛者未去而三十年前無

名之帳復以程督所謂紹興八年鹽酒餘剩錢蓋是當年鈎考所得而兩經裕民使者覈實見得尚有五十餘萬緡除放未盡則豈復有是年餘剩之數哉率爾布之下執事敢望裁察無使一害僅除而一害仍生則與不拜賜均也某行亦去此非獨為一郡憂實為全蜀憂之併乞台照

又

某竊念禮大則簡而尊者不可瀆故久不徹一牋於侍

史敢問比日台用何如蒼旻啓節恭惟三陽之和集於  
體府施及所部品物欣榮神明相此台候動止萬福其  
守地無由詣公座惟乞持精養神前究台相遠業

又

某伏以吉月上日几案之役走趨之隸皆得賀於堂下  
而其獨以在遠曾不能致善言之祝於前欲為竿牘則  
幸奉約束矣下情不勝鬱結

又

某近聞梁正字入對聖上即及虛額事梁正字首以節下為言必能上副眷懷天顏甚悅郡縣顯顯日夕冀拜此賜計庭遣簡州王通判來考實得十二萬餘緡近復遣王通判來謂如前所陳則當對移其官某不勝憂懼若此則郡縣誰復有虛額耶以其蠢愚所見十二萬餘緡者誠難盡減但取見在數裁量有若干錢可以對減則據數減之可也不必令郡縣虛額不得盡言不省台慈以為如何併乞台察

又

某所領郡歲收民租三萬餘石月支軍糧二千餘石十月開倉一歲當支二萬五千餘石十數年來民租多為諸縣過數截用及有失催去處皆經赦除放逐年借兌常平倉米某去歲三月六日至官下常平倉止餘一萬五千餘石某去冬拘催民租支十月十一月軍糧外盡行撥還常平倉二萬六千餘石年例却自正月兌支至十月開倉復行撥還某自謂今冬可以盡數撥矣近提

舉司遣簡州通判來封閉諸倉申解管鑰即此月二十  
五日軍兵便無支遣聞一道皆然事干軍政不敢不控  
告於節下伏乞台慈特賜於察因一言於使者勿云某  
有謀幸甚

又

某伏蒙眷接良厚以漢臘貺之珍劑以獻歲餽之名酒  
遂有以禦陰陽之寇而飲椒柏之和舉家同拜此賜敢  
敬謝于節下併冀台察

查總領篇

某今日遣一騶賀於節下因有區區之請劉文潛之弟  
眉州司戶叅軍燾欲侍其母并文潛妻孥往行都某已  
與荆鄂網不多也使所胙差楊絳今年夏秋一網絳以  
憂去官矣敢望改差劉燾司戶得藉此可以東適如辱  
矜從便告以一檄與之幸甚

又

某屢言計庭有未還本司羨餘鹽錢未辱許可令旄節



往臨益昌似不須靳也敢望台察

又

連日殊寒晴色亦可愛伏惟華省節蓋正宜就途神明  
所相台候動止萬福某無由送輶車之行切冀澡練神  
宅即升近侍之班

又

伏蒙開喻書勲考敬如令竊惟節下聲績久矣達於天  
朝豈復待此行且大用也

又

伏蒙賜以律令朝夕敬以從事正所願也近得微紙似佳輒進三百并三碑恐或須之所幸台察

樊安撫

汝霖

茲承已建高牙尚此凜秋伏惟神相具行台候勝常末由良晤所祈嗇養冲和前與三壽作朋

二

近審已拜制書尚留甲舍未敢率爾為賀少須開府繼

聞六加之賢奄棄內閨念欲弔諸阼階又恐徒勤無益之哀二者皆不果遣音介殊為愧仄遠承手誨當批勲考即如所戒即付步吏矣朝夕專馳一騶敬通訊也併冀台察

又

某日日伺開府即遣一騶預堂下之賀嘉陽道里回遠比方聞之亟令持書以行不省何日通於侍史今日遠承手翰情辭諄諄甚厚感愧不勝道會初攝將漕事叢

沓不克更好為狀併冀台察

陳茶馬

彌作

某朝夕聞休聲益增敬慕願聞起居狀劉提幹來伏審  
雍容明臺體府已受春和大以為喜恭惟佐天以成歲  
功見於所部令行威肅姦猾無隱神明所相台候動止  
萬福某無由叅詣謹奉一牋以報

二

獻歲發春執椒觴以賀於堂上禮也某守地既不敢出

境又奉約束不獲道輿人之頌致善言之祝下情愧仄  
不可寄言冲於已舍三陽之溫飲此春酒益介眉壽

三

某每念王公大人自非其敵誰敢時以竿牘往來用是  
久不徹聲聞於下執事但有馳心豈謂寬仁先以手筆  
問之開讀不勝感刻五肩輿敬遵符令併乞台察

四

某巡屬吏也履長之賀敢不講伏奉手命又不敢違但

引領公堂預伸善頌仰乞台察

五

某職在統內節下有所號令付一符檄可也豈謂特屈  
威尊賜以台翰丁寧告戒敢不仰體眷意所有牽馬人  
即當撻辦以待會期敢乞台察

嵩山集卷三十五

欽定四庫全書

嵩山集卷三十六

宋 晁公遡 撰

劄子

王安撫

某自去公座不得日聞起居狀敢問台用比何如恭惟  
按臨一道惡去善伸神明並相台候動止萬福某行役  
益西未有見日敬請盡消息理前膺大政之咨



二

某向來於涪陵始獲望旄節但歎服前輩盛德儀形而已近至堂上熟聞開物成務之方古之君子功烈著於簡冊者不過如此耳五十之年老眼未嘗見此西來雖極罷憊所得蓋多矣至今感詠要當終身誦而行之今遣六騶還併以謝於鈴下

三

某伏聞士大夫皆稱節下鑒裁甚峻獲進於前而得一

嘖一笑者已少况辱尊俎之奉待之如其敵者耶某何  
人首蒙是禮思所以稱此者惟服膺法度之言見於行  
事不負期待耳歸語家弟相對歎息家弟以未得預賓  
客見為恨也已約家弟往眉山它日須負擔者更當申  
言併乞台察

四

數日甘雨霈然不省治部何如恭惟善政所格風雨以  
時南畝均被餘潤公堂亦復清涼神明右之台候動止

萬福某為邦無它長以勤補拙耳賴庇尚爾充位末由  
參詣惟乞以道養壽前持荷橐

五

某視事將復三告朔常愧無可紀者為知識羞不謂節  
下用過客之言盛有推挹此蓋常常當行者耳何足為  
先生長者道哉高明果愛之願教以所不逮則幸甚

六

某伏蒙台誨欲得諸書以補文房之遺即令求之市其

無者亦往他邦求得之版墨止如是耳不審滿盛意否  
其細具錄子併冀台察

陳茶馬

某守地不得前詣車下敢問跋涉良遠台用何如恭惟  
幢蓋所至飛廉獻涼無復道暘加以神相台候動止萬  
福某更同巡屬以請保輯太和前究霖雨之施

二

某久聞大君子之名比傳制詔委以全蜀權牧之政平

生常恨不得事大君子今乃得豫在封內喜甚亟遣步  
吏奉一函以抒下情伏計已徹聽下率爾干冒悸恐

三

某伏以郡縣想聞明使者風采孰敢怠惰皆當奔走率  
職不待號令今日忽驛隸至奉手命告以聖訓丁寧同  
濟國事某開讀惶懼致煩節下憂其未知攸濟某敬以  
服膺朝夕遵承期無稽違此邦歲有期會者蓋先已施  
行矣別具錄子併乞台察

四

某今日伏準劄子告以聖上戒勅嚴峻欲使郡縣仰體宸慮同濟國事某敢不夙夜匪懈遵奉約束除條例已施行者遣人持詣節下今先具遵依申稟

任運使

伏審乘鋒車還朝方此發輒恭惟騶馭在行勞於趨裝神明所相台候動止萬福某敬候道周以見更冀順秋之令厚加調適亟趨宣室

二

某仄聞輶軒近在梓中想不無去鄉閭之念然泰山之雲豈守故岑而不布滿天下一為霖雨耶比來潦水已平大江穩流正宜鼓枻以下三峽殆須神相此行也願亟進道使聖主早聞康濟之論斯人預蒙福幸甚幸甚

三

某近見制旨以總領所錢引三百萬蠲除虛額某為之感歎此蓋節下嘗慨然為斯人建白故有此詔斯人其

孰不拜賜此部父老固已念節下之去自是重憫憫也  
惟識者則語之曰公之德豈可局於此部要當均之四  
方他日之拜賜又不止於今日者耳父老於是自今更  
跂踵以須之

四

某初未得望六轡之光華而遽來此邦日懼不勝任上  
勤程督不謂高明不待其謁而所以矜察其愚教誨其  
不逮有如賓客之舊某何以得此但歎頌盛德直求之



前輩中耳某不敢私自慶幸竊為士大夫慶其得見前輩盛德於此世也即期叅詣併致區區銜感之意

五

某近奉手命伏審邇來起居狀下情欣慰不省台用比復何如恭惟益州佳麗明臺所卜尤得爽塏賦調已定諸州承檣雍容無事神相宴處台候動止萬福某守地末由瞻謁敢乞盡消息理前開宣室

六

某得郡於巡屬當詣節下受約束而來伏蒙符令欲使  
治業赴功不可曠職既不克前即亟為墨啓代見但得  
侍史通之賜以一覽幸矣豈謂特屈答教感誦辭旨銘  
佩不敢忘也

七

某雖未面君子之光儀乃蒙眷顧厚於他邦益用慕向  
直欲日日上一牋代謁見敢問台用比何如恭惟仁風  
所扇被於列城無復劇暑神明嘉相台候動止萬福某

無以効於門牆惟與受帡幪者敢請以道養壽為國柱石

八

某視事以來初未有以自効率先諸郡以應期會但數有請於節下論其迹可謂愚不勝任上煩處決宿夜悸恐所有春季綱即已盡起自今敢不更竭衰鈍要使凡餉大軍者悉如今伏望台慈無以此邦為憂特勞帳下遠賜程督

九

某以迂疎之才而當頽敝之後常以空乏告於節下如蒙不責其短淺以不能興起蠹壞有所捃摭以應公家之須不賜譴訶已大幸矣敢謂寬明特加憐察賜以隆州井鹽使軍吏得以足食某自念何以拜此大貺惟當終身歸德門下自今日始

范運使

伏承鷁首之西正爾溽熱不省台用何如恭惟盛德所

至川后寢波山祇獻涼台候動止萬福某敬遣一介以  
候榜人

二

敢問去夔門今幾何日跋涉之久伏想厭齋舫之偈仄  
思棟宇之軒豁某州廨有可以偃休不審肯留宴休以  
揖千里之風敬以請於節下

三

某間者初見父老忘其不勝任之愧而有不乏食之喜

輒具一牋謝於門牆但所遣持書者徑下吳甸似非專  
敬至今慚悚不謂台慈不以是督過之尚賜手答下情  
感刻無言可喻

四

某辱門下生之列又得與寵弟合符造物重以此好使  
為小人之光榮幸甚幸甚每念昨在硤內以無可紀之  
政而蒙深知當時但為感歎今則始識其難遇也胷中  
壹鬱更須言侍當悉布之

宋提刑 嗣孫

某伏省旄節按行巡屬當此盛夏敢問跋涉不至勞乎  
恭惟褰帷問俗神明嘉相風伯獻涼不知煩暑台候動  
止萬福某敬遣一介以候車塵

二

某聞諸部內之民思仰盛德朝夕願見不啻當暑而思  
濯清風忽聞使輶近止上下延頸以望不勝喁喁

三

此月正是土潤溽暑之時居喪塋者猶病煩熱伏聞輜車犯此炎天慮有淹繫蓋仁人之心闔境歎息不知以報惟冀戴星而行日出而舍以避道暍不勝拳拳之請

四

某迂疎不勝一郡之寄而復視事日淺州綱頽壞多矣遽承節下按臨為之悸恐更望台慈有以教其未達而寬其不逮幸甚幸甚



五

某不勝瞻仰之情日日欲聞食味狀而念數遣書則瀆  
不遣書則乃心無由宣寫顧寧瀆耳敢問台用比復何  
如邇來江雨時作山田膏潤暑氣亦解恭惟盛德所格  
獄訟衰息神明所相台候動止萬福某與闔部仰祈以  
道養壽再登赤墀

六

某不自量投屯煩閤晨興符檄滿前皆為錢而來衰鈍

殆不能應期會夙夜憂懼然念節下在當道素辱憐察  
豈忍使之坐不勝任而去必有以左右之今日鮮于法  
曹忽來告明臺遣鞠獄於雅安某不覺惋駭方恃節下  
有以左右之今乃奪其同官之良何也既而思之節下  
蓋不知之爾此邦官屬率罷懦而判官司戶輩皆出惟  
法曹君可屬以事正委之究治諸縣逋負諸司歲起緡  
錢如明臺所督綾絲及贍軍科目稍見涯涘比去年有  
加矣若一出旁郡動須數月鞠獄常事它州官皆可辦

而此邦失法曹君則某將無以免負殿以累節下所繫甚大伏望台慈特免其行幸甚幸甚

七

伏以乘傳按行所部道遠天且炎熱不省台用不至勞乎恭惟宣布上意哀矜庶獄神明所相台候動止萬福某竊聞揭節還臺遣一介候於境上敬以煩令持生為請

八

伏惟六轡所臨不待號令之施郡縣竦畏皆知警厲以愛民奉法為先斯人拜貺大矣道路嘖嘖嗟稱咸願使節之日按臨也甚盛

九

某治郡無狀日者使輶臨之所宜得譴訶者多矣獄吏止從薄罰某亦止以對易獄椽違戾而賜薄責得以微罪行免積久有大曠敗以累平日識察在某亦可謂幸也朝夕杜門以俟汰遣更當俟弭節過郡痛自推謝併

乞台照

嵩山集卷三十六

欽定四庫全書

嵩山集卷三十七

宋 晁公遡 撰

劄子

宋提刑

某敢問使節循行一道跋涉甚勞既還明臺休駕息徒  
台候何如恭惟始就宴息心廣體胖喜此節莢神明加  
相台候動止萬福某敬奉一牋候諸侍史惟以尊生為

請前須璽召

二

某治郡不進兩辱輅車臨之實大悸恐謂將被汰遣不謂尚賜全度朝夕畏懼明使者之威稜終憂難以安位益覺迂拙非適時之才惟理折轅以須黜免伏紙愧仄

三

某到官承顏敝逋負不入官兵至半年無牢廩某即勾稽以督其輸送蓋是累年賦租爾近見節下揭榜備坐

赦書正謂布估水脚此州無之某豈敢違戾肆眚之文  
壅遏德澤不下伏恐不知其狀輒布露之

四

某妄庸之姿輒來汙重部牧守之列加以不能仰遵條  
教每勤程督豈可更出意見妄有申論然大君子納汙  
藏疾肯斥其愚而不容貸某用此敢言之彭山劇邑賦  
調居十之五其令昏老不任事惟丞常巽方倚以集事  
今蒙節下委任唐安勢須數月乃歸則邑事愈致曠廢



某不敢祈免其出但自憂懼不治之罪將愈大矣惶恐惶恐

查運使

伏計夔部為仁氣所熏今夏雨暘以時無復煩蒸恭惟  
弭節所臨神明所相台候動止萬福某竊欲徹聲聞於  
節下敬以置郵返報因請尊生以究台相遠業

又

某近覩邸吏報聖上以硯內不足勞節下惟益部為西

蜀重地移玉節臨之某為之喜者累日向來不得久在  
巡屬乃今復託庇庥殆天憐之從其志耳已作牋遣詣  
輶車之前今日驛吏出示教賜尚未語及發軔何也梁  
山所放錢穀事開喻本末乃爾固知大君子用意自應  
如此昨得之景少叔者妄傳耳併乞台察

又

東望節下眇然不省台用比何如硤門多風伏惟調度  
已定塞向禦冬神明交相台候萬福某敢同巡屬以頤

生為請遂歸行內

又

比蒙印諸書方念恐不契高意為懼爾重承開諭再以  
紙來要補文房之未備已屬書肆矣函使不可待敬遣  
詣明臺須鄭明至付之也孫掾荷矜憐欲一振其淹滯  
幸甚如西舍可為致力否某不啻如飢者捧杯棬以待  
更冀台察

又

某幸甚蚤獲預英游而姑氏孫涪州亦識先府君且有  
海陵之好某恃此輒敢言之某生十一年而孤為孫涪  
州教育已恨不及其存有以報之今涪州惟有一孫文  
昌見任南平軍司理叅軍某已為求得薦章二念欲使  
之改中都官庶以少慰九原微節下不忘疇昔其孰可  
告之伏望台慈憐其不背本之誠而就其欲報之志特  
賜論奏則豈惟某銘佩恩造其孫涪州亦當銜感於下  
泉率爾干冒惶恐

又

某比在巡屬不得見節下既來此邦又不能專以一介  
修敬因遣至吳會者持牋以通之侍曹不謂遠蒙手答  
勤勤懇懇益增愧仄不省台用比何如秋已深矣恭惟  
漕引阜通神明所相台候動止萬福某守三里之城坐  
縻廩粟而已末由與賓客見敢冀厚自持復歸行內

又

某平生不樂與世追逐老益衰慵得一郡豈其所堪直

爲貧所驅耳常思得田租百餘斛茅茨數椽即葉官而  
歸杜門面壁以了餘年書亦不復觀今誰能用書之說  
哉此邦書籍甚富果嘗求之市節下嘗為人主所知其  
學蓋可用於天下此邦書籍非節下尚誰求之已即印  
造敬付侍史以歸併冀台察

又

驛隸轉致旨告欣省秋深偃節臺府台候勝常令叔同  
劉君舟行欲少遲留無傷也恐須報忽忽附驛馬隸不

及細未間所冀善調適前侍黼宸

又

畫省之節未行履此杪秋伏惟四道欣欣願聞薄賦神明所相台候萬福末由趨詣切祈積精適神佇觀燭野光朝

又

聖上知巴蜀之人困矣節下蓋嘗入侍清光妙膺簡在令以外計相付某已染削為巴蜀之人賀朝夕致之墨

曹

又

某充位以來無可筭錄所賴伐柯不遠遂得期年無大曠敗感刻不勝道望戒主者吏即批吏考敢以為請

周運使

比奉手命已作答未遣諸郎至復辱勞苦之問下情感佩重勤無言可諭因得具省邇來起居狀尤用欣喜嚴霜已零恭惟硤門甚寒調度已定宴處溫密神明所相



台候萬福某守地無由詣見更冀持精養神前升清要

二

某遙想聲名當與赤甲白鹽爭高甚恨去硤內之蚤不  
及見此豫治部受賜之數然外姪右修職郎南平軍司  
理叅軍孫文昌實事節下儻因薦賢之餘特加論奏使  
獲秩滿改中都官則某雖去硤內不為不受賜也率爾  
言之悸恐悸恐

三

台庭內屬過此上下俱安諸郎秀偉之姿真山嶽之寶  
不匱也適會慶節屠肆不開而使艤不可少留姑具蔬  
食為愧耳

樊運使

大君子所舍自有中和之氣敢問台用比何如恭惟偃  
節宴居衿抱春溫神明所相台侯動止萬福某敬遣一  
介詣節下代肅拜之謁

又

某巡屬吏也元日不能從賓客賀當修竿牘以伸善言之祝顧奉約束敢忘遵承惟是拳拳之情日冀履此泰亨遂歸廣內以膺大政之咨不勝誠禱

又

某伏審掖垣書贊始下綸告封內傳誦制詞以為聖上知節下深矣一道循行豈夕留之地耶某願賀於明臺而所被符移中親洒手筆戒以無得通牋某安敢違令但與吏民稱幸而已伏乞台察

又

某近上一牋方懼為瀆豈謂特被答教告以無若昔者  
病守期於盡應歲會某何以仰副責望由來性本迂拙  
無豐財之方亦如病守循守故常何能充此歲虛之額  
但不敢奪官兵奉稍求免乏興而已今者獲遇明使者  
委官考覈將為之蠲除以救彫敝幸甚幸甚比所委官  
已考覈得二十餘萬緡使司如疑其未實載加詰問某  
竊思之使司亦安能於此一郡盡除其數不若量度闔

部可減若干錢而此一郡為當若干則於考覈得十二  
餘萬緡之中止取某科名除之其它不從可也庶幾不  
致上勞符移之煩易以得實不審高明以為可聽否更  
乞台照

又

某伏見夏令未應天氣甚清敢問體府亦愜此否恭惟  
宣布德音遂致中和旌節所居神明來衛台候動止萬  
福某守地無由詣節下敢請盡珍重理前升九德之位

又

某充位以來已復踰年遵奉教條固敢失墜封內今年  
麥亦善收無大疾癘竊與父老感歎不敢忘節下之德

又

某伏見今歲日寒而寒天序甚正似於遵養為宜敢問  
台用比復何如恭惟理財以道中和之氣浹於封內神  
明並相台候動止萬福某敢同巡屬以請餐衛適時保  
固體府前與三壽作朋

又

某職在巡屬當日詣屏下聽約束顧守地不獲此志又不敢時以牋上明臺乃心馳向於公座不啻川駛而雲飛也伏乞台察

又

某於元日不得從賓吏賀恭惟一道稟畏皆應歲會明臺無事飲此春酒以介眉壽台候動止萬福某無由叅詣敢乞節宣以時遂如闕宮之頌永享台背鯢齒為王

室輔

又

某比率爾上一牋巡屬修敬當如是耳伏蒙寬仁特賜  
答教展讀在手銘佩著心幸甚幸甚

又

某去三月六日至此邦舉隅皆獎而常平倉米止餘一  
萬五千餘石其累歲不撥還者二萬餘石蓋諸縣截用  
及負逋不入故也某即皆程督去冬盡以所收撥還二



萬六千餘石所餘今冬可以悉如額矣近准使司委簡  
州通判王宣教來封閉常平倉申納管鑄此邦從來以  
新易陳自正月接續支軍糧至十月收民租則撥還令  
若閉倉則即日諸軍無廩給兼貧乏乞丐口食亦無支  
矣敢望台慈特賜矜察行下王通判免解管鑄事迫言  
切惶恐待命之至

郭提刑

伏聞節下將歸甲舍江水尚平川原清麗足以寓目恭

惟冲衿超然神相次舍台候動止萬福某日聽擊汰之音前詣江干未間更祈盡消息理前膺大政之咨

二

某久不通問節下非敢忘盛德屬以不勝郡寄且念高懷超絕豈事世俗之禮故耳其如馳心夫子之牆則夙夜以東也齋舫即日行矣伏乞台察

三

某比不敢違手命輒記雲谿勝地顧何足汙樂石耶遠

蒙賜以墨本得託大名及妙墨并以不朽幸甚幸甚

嵩山集卷三十七